

Selagi Corak Ekonomi Tidak Berubah

Umat Melayu Tak Kan Merasai Nikmat Hidup Sepenuhnya

Telah sedia maklum, bahawa semenjak bangsa kita Melayu dan negara kita Tanah Melayu ini terletak di bawah kekuasaan penjajah-penjajah dari Barat, selain dari kebudayaan, kesenian, cara berfikir dan mata pelajaran, maka yang terpenting sekali perekonomian kitalah yang mereka hancur leburkan susunannya, kemudian mereka susun pula secara perekonomian baharu yang menguntungkan mereka dan melumpuhkan kita. Mereka telah mengetahui akan apa yang sebenarnya iaitu politik yang tidak bertapak di atas suatu susunan perekonomian yang sihat bagi satu-satu bangsa itu, samalah dengan “nyawa” yang tidak bertubuh layaknya.

(Oleh: ‘Alimin)

Orang-orang Melayu dan Penghidupannya:

Dengan tulisan ini, saya tidaklah bermaksud untuk mencemuhkan penghidupan atau kehidupan orang-orang Melayu kita sendiri di samping bangsa-bangsa lain di Tanah Melayu ini, hanya sanya saya ingin membentangkan sedikit sebanyak perihalnya terhadap masyarakat kita, terutama kepada peringkat pemuda pemudi kita sekarang supaya sama-sama maklum dan mengambil perhatian hendaknya sedapat-dapatnya. Dipandang secara umum, bahawa hal penghidupan orang-orang kita bangsa Melayu di tanah air ini ialah terbahagi kepada empat golongan iaitu, pertama: Golongan yang disebut bangsawan, mereka kebanyakannya menjadi pegawai kerajaan berpangkat tinggi, berpendapatan banyak dan kaya. Kedua: Golongan saudagar, mereka terdiri dari tuan-tuan punya ladang getah, kelapa, sawah padi dan ahli perniagaan. Ketiga: buruh di pejabat kerajaan dan di ladang-ladang getah serta lain-lainnya lagi. Keempat: Pekerja-pekerja

biasa yang mengambil upahan dalam merata-rata tempat dengan bermodalkan tulangnya yang empat kerat itu sepanjang masa. Dalam sebanyak kira-kira hampir 4, 000, 000 orang-orang Melayu di negara kita ini hanya kira-kira setengah peratus sahaja yang berada dalam golongan pertama tadi (Orang-orang Besar Negeri), dan sebanyak kira-kira sepuluh peratus dalam golongan kedua (golongan kaum saudagar) dan sebanyak kira-kira empat puluh peratus pula yang jadi buruh dalam golongan yang ketiga tadi. Dan yang lainnya itu iaitu golongan keempat pekerja biasa tadi. Orang-orang Melayu yang mendapat ribuan ringgit pendapatan dalam sebulan ialah orang-orang golongan pertama dan kedua sahaja, sedang golongan ketiga dan keempat itu hanyalah ratusan ringgit bahkan ada yang hanya puluhan ringgit sahaja pendapatan mereka dalam sebulan. Menurut apa yang saya ketahui, iaitu umpamanya seorang buruh penoreh getah dalam ladang (estet-estet) kepunyaan syarikat-syarikat orang-orang Eropah,

mereka berpendapatan hanya kira-kira tiga atau empat ringgit dalam sehari, demikianlah pula halnya dengan pekerja biasa tadi di kampung-kampung, dan mereka hanya boleh bekerja selama dua puluh hari hingga dua puluh lima hari dalam sebulan kerana pekerjaan mereka amat banyak menggunakan tenaga (berat), bererti mereka hanya dapat kira-kira seratus ringgit sebulan sedang tanggungan mereka banyak. Setengah daripadanya, ada yang mempunyai enam orang anak yang masih dalam jagaan mereka. Apakah dengan wang pendapatan mereka yang sebanyak itu boleh mencukupi bagi segala keperluan-keperluan mereka, terutama bagi mereka yang banyak tanggungannya? Apakah orang-orang yang seperti ini tidak mempunyai keinginan untuk “hidup” yang sepatutnya seperti lain-lain orang “hidup”?

Masyarakat sahajalah yang akan memberikan jawapannya!

Hidup Tidak Terjamin:

Melihat kepada suasana perekonomian dan penghidupan rakyat banyak di tanah air kita yin¹, baik sebelum merdeka mau pun sesudahnya seperti sekarang ini, terutamanya di sisi bangsa kita Melayu sendiri yang dikatakan tuan punya negara ini yang sejati, selain dari pegawai-pegawai pemerintah dan kakitangan-kakitangannya serta saudagar-saudagar yang tersebut tadi (ahli-ahli perniagaan besar dan tuan-tuan punya ladang-ladang yang luas) nyatalah penghidupan-penghidupan mereka dalam banyak segi seperti kesihatan, pelajaran dan lain-lainnya tidak terjamin sama sekali. Oleh kerana yang demikian halnya dalam masyarakat kita terus menerus berlaku, dipercayai akibatnya banyak kejadian-kejadian yang tak diingini kerap terjadi. Tegasnya, selagi corak



Tengku Farid bin Tengku Husin dari Kuala Terengganu,

dan Tuan Lim Kok Min dari Pulau Pinang sedang mendengar penerangan dari duta Amerika di Persekutuan Tanah Melayu, Tuan Homer M. Byington Jr, sebelum mereka bertolak ke Amerika sebagai tetamu kepada Universiti Hawaii.

Mereka akan tinggal di Honolulu selama 4 minggu

dan akan mewakili Universiti Malaya dalam Seminar Pelajar-Pelajar Sedunia anjuran Universiti Hawaii dan kemudiannya akan melawat tanah besar Amerika Syarikat selama dua minggu.

ekonomi yang terbentuk *imperialism* dengan beralatkan *feudalist* dan *kapitalist* itu tidak berubah, maka umat Melayu di Tanah Melayu ini tidak akan menemui dan merasai nikmat hidup yang sepenuhnya. Menurut pendapat saya, hal-hal yang seperti itu, yang boleh dikatakan juga “penyakit dalam masyarakat”, ada baiknya diambil perhatian yang sewajarnya oleh pemimpin-pemimpin dan wakil-wakil rakyat yang telah dipilih oleh rakyat, demikian juga oleh pemerintah sendiri hendaknya.

¹Kesalahan teks, sepatutnya ‘ini’.